

HUNSRIK 1466

Haloo, hier is Solange Hamester Johann, fom Projekt Hunsrik.

30SEPTËMPER: TAACH FON TE PIIPEL

SEPTËMPER: MOONAT FON TE PIIPEL

Pis hayt, is ti Piipel in 2.500 xprooche iwersetst kep un, wën tas ach es puch is woo te meyerxt fertaylt kept uf te Welt, mus ti Piipel noch fer 4.500 xprooche iwersetst kewe.

Fon tene mee wii 7.000 xprooche uf te Welt, hon 700 xprooche ti komplët Piipel xon kriit. Soo, mee wii 5 milioone mënxe, neekst 70% fon te Welt pefolkerung, hon yets ti KANS Piipel in sayn Moter Xprooch.

Te Naye Testamënt waar xon fer 1.200 xprooche iwersetst kep;

Anere picher - wii ti Ewankeelye un Psalme, waare fer 850 xprooche iwersetst kep.

\*Im yoer 2020 waare 31 milioone eksemplare fon te komplët Piipel fertaylt kep uf te kans Welt, un 5,7 milioone eksemplare fom Naye Testamënt.

\*In 2021 waare etwa 32,5 milioone eksemplare fon te komplët piipel fertaylt kep, un fom Naye Testamënt 5 milioone, tëm noo informatsioone woo ti USB-União das Sociedades Bíblicas aan kesaat hot, woo etwa 75% fon te komplëte iwersetzunge unerxtitst, woo tepay ti iwersetzung fom Naye Testamënt fon unsre Projekt.

Mit tas ales, hat te Projekt Hunsrik Plat Taytx ti hooch eere un kroos frayt fer unser liipe heerer informeere tas yets im neekste moonat Oktoower/2022 ti tswaayxproochich publikatsioon = Hunsrik/Portukeesix fom Naye Testamënt in Hunsrik, iwersetst fon unser them fer ti SBB-Soc.Bíblica do Brasil, woo mitkliiter is fon te USB, woo ti international fersammlung fon 160 nationale piipel keselxafte is, woo in iwer 180 natsioone aktiif sin.

Es lost uns kans animeyert 700 xprooche mit te komplët piipel siin. Tas is frucht fon jeneratsioone woo sich keopfert hon mit jenerositeet. Yeete piipel iwersetzung tauert yoore lang hart aarwat un fiil tetikatsioon fon mëner un fraue woo en kroos tayl fon sayn leewe in tee aarwat investiert hon, woo soo important fer ti foleke fom Planet is. In unsre fal, neekst 10 yoer aarwat fer te Naye Testamënt uf Hunsrik fërtich iwersetse.

Mier hofe tas unser layt – unser folek froo kept mit uns un sayne eksemplar khaafe tuun, mit en topelte opjektiif: tas Kotes Wort in te xprooch fon unser hërts kriin un, wayl ti wërse fon te Piipel al numeriert sin, wërt es aach kans laycht sin unser moter xprooch lerne leese un xraywe. Te format fon te Piipel is popular, soo tas yeete ëne sayn aychne eksemplar khaafe khan.

Xeene Kruus aus Thee Walt.